



# *Cumün da Scuol*

---

## **Dal cussagl cumünal**

---

In sias ultimas sezzüdas ha il cussagl cumünal trattà surtuot las seguaintas fatschendas:

### **Ascensur pella chasa da scoula**

Al cumanzamaint dal nouv on da scoula (avuost 2009) sto ün uffant dependent da la sopcha cun roudas pudair rivar i'ls locals da la scoula secundara sül 3. plan da la chasa da scoula. Üna gruppa da lavur cun rapreschantants dal cumün e da la scoula ha discus trais variantas per ün ascensur extern, elavuradas da l'architecta incumbenzada Marisa Feuerstein. Il cussagl ha decis in seguit pella varianta cun ün annex vi da la fatschada vers nord, üna construcziun convenziunala in mür cun üna reboccadüra listessa sco l'existentia. Ils cuosts s'amuntaran a circa CHF 470'000.--, quai vuol dir 70'000.-- daplü co stat büschetà. Perquai vegnan suottamiss ils cuosts implü al referendum facultativ. I's po far quint cun contribuziuns davart las instanzas chantunalas correspundentas, da maniera cha'ls cuosts nets pel cumün saran per finir probabelmaing suot la summa büdschetada.

### **Energia Engiadina**

Fingia daspö ün pêr ons exista l'intenziun cha l'EE-Energia Engiadina dess gnir transfuormada dad üna gestiun cumünala in üna interpreta giuridica independenta. Quist pass es necessari per pudair mantgnair l'EE sco gestiun i'l marchà liberalisà. Scha la EE nu vess da dvantar üna organisaziun regiunala es il privel fich grond ch'ella perda vi e plü cliaints ed ha in avegnir difficultats da mantgnair las plazzas da lavur da fin qua. Il cussagl cumünal ha confermà sia intenziun dad inchaminar quista via, culla premissa cha l'EE gnia transfuormada in üna corporaziun dal dret public e brich in üna società d'acziuas. A quista corporaziun da dret public dessian pudair as participar dasper il cumün da Scuol tuot ils ulteriurs cumüns da la regiun. L'ultim pled regard quist pass ha la cumünanza d'urna a Scuol.

### **Halla Gurlaina**

Il cussagl ha decis da surtour la garanzia da deficit pels prossems quatter ons, dimena dal 2010 fin al 2013, ill'otezza da CHF 94'523.--/on.

## **Cumischiun da trafic**

Sco quart commember da la cumischiun da trafic (sper Riet Denoth, Linard Marugg e Marcus Wetzel) es gnü elet Ludwig Hatecke.

## **Bus da sport/bus local: fermativa Chalzina**

In vista a l'attach da Prà da Bügl vegn la fermativa Chalzina levada temporarmaing. I's tratta d'üna fermativa cun pacas frequenzas. Pervi da l'attach manzunà saran da far eir adattamaints vi da la via da Trü, ed in quel connex es lura l'acquist da terrain indispensabel. Il predsch pel terrain as drizza davo otras cumpras cha'l cumün ha stuvü far ils ultims ons ed importa CHF 130.-- al m<sup>2</sup>. L'uffizi da fabrica piglia sü contact culs proprietaris pertocs.

## **Protecziun dals na-fümaders**

Daspö cha la nouva ledscha da sandà es in vigur es passà fingià bundant ün on. Uossa less il departamaint da güstia, sgürezza e sandà dal Grischun dudir las experienzas fattas culla nouva ledscha. Il cussagl approvescha la posiziun dal cumün al departamaint, premiss cha singulas parts vegnan formuladas amo ün pa plü sever.

## **Surdattas da lavuors**

- Chasa du Parc, rimplazzamaint da las fanestras: Falegnamaria Spiller.
- Avertüra dal quartier Buorna: Caprez Indschegners SA.

## **Dumondas da fabrica**

Il cussagl resp. la direcziun han dat ils seguaints permiss da fabrica:

- a l'Arredo GmbH, Scuol per fabricar intuorn ed ingrondir il stabilimaint da la Swisscom in Rachöгна
- a la Guardaval Scuol AG per üna sauna our'il liber sün parcella 769 in Döss
- a la butia *Moda per giuvenils* per plazzar chavognas cun crappa e binderas sül marchapè davant butia sco eir per montar glüms externas

Il cussagl ha plünavant refüsà üna dumonda per pudair far perforaziuns per sondas geotermicas fingià in marz (tenor ledscha da pulizia sun admissas talas lavuors be dadour la stagiun, dimena pür davo Pasqua).